

## Mkombozi Mchungaji Mnyenyekevu

*Mungu akamwita kutoka katikati ya kile kijiti, akasema, Musa! Musa! Akasema, Mimi hapa. Naye akasema, Usikaribie hapa; vaa viatu vyako miguuni mwako; maana mabali hapa unaposimama ni nchi takatifu—Kutoka 3:4, 5.*

**W**akati wa ukombozi wa Israeli ulikuwa umefika. Lakini kusudi la Mungu lilikuwa litimilizwe kwa namna ya kutwezwa kwa kiburi cha wanadamu. Mkombozi alipaswa kutoka kama mchungaji mnyenyekevu, akiwa na fimbo tu mkononi mwake; lakini Mungu angeifanya fimbo hiyo kuwa ishara ya uweza Wake. Siku moja akiwa anaiongoza mifugo yake karibu na Horebu, “mlima wa Mungu,” Musa aliona kijiti kikiwaka moto.... Sauti kutoka motoni ilimwita kwa jina lake. Kwa midomo itetemekayo aliitikia, “Mimi hapa.” Alionywa asisogee pasi na kicho....

Upole na kicho vinapaswa kudhihirika katika mwenendo wa wote wanaokuja katika uwepo wa Mungu. Katika jina la Yesu tunaweza kuja mbele Zake kwa ujasiri, lakini hatupaswi kumkaribia kwa ujasiri wa kiburi, kana kwamba Yuko sawa nasi. Kuna wale wanaozungumza na Mungu mkuu, mwenye uweza wote na mtakatifu, ambaye anakaa katika nuru isiyoweza kukaribiwa, kama ambavyo wanazungumza na mtu aliye sawa nao, au hata aliye duni kwao. Kuna wale wanatenda katika nyumba Yake kwa namna ambavyo wasingethubutu kufanya katika chumba cha mkutano na mtawala wa kidunia. Hawa wanapaswa kukumbuka kwamba wako mbele Zake Yeye ambaye maserafi wanamsujudia, ambaye mbele Yake malaika hufunika nyuso zao. Mungu anapaswa kuheshimiwa sana; wote wanaotambua uwepo Wake kwa kweli watainama kwa unyenyekevu mbele Zake....

Musa alipongoja kwa unyenyekevu wa kicho mbele za Mungu maneno yaliendelea: “...Haya, basi, nitakutuma sasa kwa Farao, ili upate kuwatoa watu wangu, hao wana wa Israeli, katika Misri.”

Akiwa ametekewa na kuogofywa kwa amri ile, Musa alisita.... Musa aliona mbele yake ugumu ulioonekana kushindikana. Ni ushahidi gani angewapa watu wake kwamba kwa hakika Mungu amemtuma? ... Ushahidi uliovutia hisia zake mwenyewe sasa ulitolewa. Aliambiwa atupe fimbo yake chini. Alipofanya hivyo, “iligeuka kuwa nyoka; na Musa alikimbia mbele yake.” Aliamriwa kuichukua, na kisha ikageuka kuwa fimbo mkononi mwake.... Bwana alimhakikishia Musa kwamba watu Wake mwenyewe, pamoja na Farao, walipaswa kusadikishwa kwamba Mmoja aliye mkuu kuliko mfalme wa Misri alikuwa alidhihirika miongoni mwao....

Mungu alibariki utii wake ulio tayari, naye akawa mwenye kusema kwa ufasaha, mwenye tumaini, mwenye utulivu, na aliyefanywa kufaa sana kwa ajili ya kazi kubwa zaidi kupata kupewa mwanadamu. Huu ni mfano wa kile Mungu anachofanya ili kuimarisha tabia ya wale wanaomwamini Yeye kabisa na kujisalimisha wenyewe bila mipaka kwa amri Zake (**Patriarchs and Prophets, 251-255**).